

In bel regal per l'onn giubilar

Tavau: Sanaziun da l'Arena da glatsch «Vaillant»

DA GION NUTEGN STGIER / ANR

■ **Daplis posts da seser, dapliras sortidas d'urgenza, dapli segirezza per ils visitaders e dapli spazi per la gastronomia. Quai cumpiglia la sanaziun da l'Arena da glatsch «Vaillant». Investads vegnan 25,5 milliuns francs e l'avertura duai esser l'onn da giubileum 100 onns HCD.** Il grond interess da las medias per la preschentaziun dal project da sanaziun ed amplificaziun saja segir d'attribuir al HCD che saja adina in magnet e quai er sur il cunfin grischun, ha ditg ier *Tarzisius Caviezel*, il landamma da Tavau, en ses pled da bainvegna. L'antier president dal HCD ha er ditg che l'Arena da glatsch «Vaillant» saja segir la pli bella halla da glatsch en l'Europa.



L'Arena da glatsch «Vaillant» a Tavau survegn in nov vestgì extern ed intern. FOTO G. N. STGIER

Trais raschuns principalas per la sanaziun

La «catedrala» da glatsch, sco quai che la halla «Vaillant» vegn er numanda, na correspunda betg pli a las pretensiuns da la polizia da feu e da l'assicuranza d'edifizis, ha ditg Caviezel. Ultra da quai adempleschia ella na pli a las ordinaziuns necessarias da la liga da hockey naziunala. Vitiers haja er il Club da hockey Tavau intgins giavischs, per exempel quai che pertutga gardarobas e locals per equipament e material, punctuescha il Lumnezian.

«Ils custs avain nus en maun»

Caviezel ha menziunà che la summa d'investiziun da 25,5 milliuns saja tuttina in pau. El ha dentant ditg il suandant: «Ils custs avain nus en maun.» En ils davos quatter onns haja la vischnanca reduci pulit ils debits e la sanaziun ed amplificaziun da l'Arena da glatsch «Vaillant» na vegnia betg a procurar per ina ulteriura muntogna da debits. Ils davos trais onns haja la vischnanca fatg reservas da sis milliuns francs per quella sanaziun, da la vart dal chantun haja el retschet signals positivs per in sustegn finanziel da tschintg milliuns francs e radund quatter

milliuns duaian vegnir dal fond d'investiziun da la vischnanca.

11 architects han inoltrà lur project

Cornelia Deragisch, l'architecta da la vischnanca da Tavau, ha ditg che 11 architects hajan inoltrà lur projects per sanar l'arena da glatsch. A la fin sajan lura restads quatter projects e da quels quatter projects saja la giuria la finfinala sa decidida per il project da *Daniele Marques* dal biro d'architettura Marques SA SA Lucerna. Suententer la stagiun da hockey 2017/18 vegnia immediat cumenzà cun las emprimas lavurs, ha ditg la dunna dal rom. L'atun 2018 e 2019 vegnia il HCD a giugar las emprimas diesch rundas dal campinadi ordaifer, quai che saja gia regl cun l'Associazion svizra da hockey, ha ditg Deragisch. Per l'onn da giubileum da 100 onns dal club, il 2020/21, saja planisada l'avertura da la halla da glatsch sanada.

Mantegnair ses agen caracter

Da nov vegnia l'Arena da glatsch «Vaillant» ad avair be 1800 plazs da star en pe enstagl 3400, ha ditg l'architect Marques. Persuenter stattan a disposiziun supplementar 1600 plazs da seser. Ina pli

gronda surfatscha survegnia er la gastronomia e da nov saja er pussaivel dad avair en l'entira halla access tar ils manaschis da gastronomia e tar tuts secturs, ha menziunà l'architect che ha gudagnà la concorrenza per quel project da sanaziun. Marques ha ditg che da gronda impurtanza saja stà per el da disfar il maletg da l'object e da laschar il caracter unic da la «catedrala» da glatsch. *Marc Gianola*, l'antier capitani dal HCD e president da la Cuppa Spengler, ha ditg che per segirar er en l'avegnir quel turnier saja urgent da dar a l'Arena da glatsch «Vaillant» in nov vestgì.

Ina nova halla da trenament

A pled è er vegnì *Gaudenz Domenig*, il president dal HCD. Per tegnaire pitg als concurrents saja bain dad avair in bun cader, dentant da basegns saja er ina infrastruttura adequata. Gist perquai saja la sanaziun ed amplificaziun da l'Arena da glatsch «Vaillant» indispensabla. Il club sez vegnia a realisar dasper l'arena ina nova halla da trenament, vul dir il plaz da glatsch existent sut tschiel avert survegn in tetg. Domenig ha ditg che dals sis milliuns francs che quel bajetg vegnia a custar sajan il mument gia avant maun var quatter milliuns francs.

Lotga anstagl hockey

■ **(gns) Dumengia proxima è schianavant e l'Arena da hockey «Vaillant» davainta en camp da lotga cun total 180 participants. Anavos aint igl razgem turna er Armon Orlik.** Igl interess per l'occurrnza da lotga è immens grond ed an spezial per plazs da seser. Chegl è er stada la raschung tgi igl comite d'organisaziun ò decidia da far ainten la halla, dalla vart ost, supplementar 750 plazs per seser. A chel giaveisch ins seia gugent nia ancunter, dei *Nuot Lietha*, igl schef da medias dalla 122avla Festa da lotga dalla Svizra digl nordost. Dalla parteida è ple u manc

l'elita da lotga dalla Svizra orientala cun dasper *Armon Orlik* anc *Michael Bless*, *Arnold Forrer*, *Daniel Bösch* e *Samuel Giger*. Digls lotgaders bernes èn preschaints *Thomas Sempach* e *Simon Anderegg*. Dalla Svizra centrala vignan er dus aspirants per gudagner l'occurrnza e chegl èn *Marcel Mathis* e *René Suppiger*. Armon Orlik (Grischun) cumbatta ainten l'amprema lotga cunter *Stephan Studiger* (Argovia), Samuel Giger (Turgovia) vo aint igl razgem igl amprem cun *Thomas Sempach* (Berna) e *Daniel Bösch* (Son Giagl) cumbatta cunter *René Suppiger* (Lucerna).

